



Broj: 01/5-50-1-5-46/10
Sarajevo, 1. 2. .2010. godine

IZVJEŠTAJ O RADU KOMISIJE ZA SAOBRAĆAJ I KOMUNIKACIJE
PREDSTAVNIČKOG DOMA U 2009.GODINI

Sarajevo, februar 2010. godine

Na osnovu člana 31. stav (2) Poslovnika Predstavničkog doma Parlamentarne skupštine Bosne i Hercegovine ("Službeni glasnik BiH", br. 33/06, 41/06, 81/06, 91/06, 91/07 i 87/09), Komisija za saobraćaj i komunikacije Predstavničkog doma Parlamentarne skupštine Bosne i Hercegovine, na 46. sjednici, održanoj 1. 2. 2010. godine, usvojila je

Izveštaj

o radu Komisije za saobraćaj i komunikacije Predstavničkog doma u 2009. godini

1. Uvodne napomene

Komisija za saobraćaj i komunikacije Predstavničkog doma Parlamentarne skupštine Bosne i Hercegovine (u daljnjem tekstu: Komisija) stalno je radno tijelo Predstavničkog doma Parlamentarne skupštine Bosne i Hercegovine (u daljnjem tekstu: Predstavnički dom). Nadležnost Komisije određena je članom 45. Poslovnika Predstavničkog doma, prema kojem Komisija razmatra pitanja koja se odnose na:

- putne isprave;
- boravak i kretanje stranaca;
- odnose s Interpolom;
- uspostavljanje i funkcioniranje zajedničkih i međunarodnih komunikacija;
- reguliranje međuentitetskog saobraćaja;
- kontrolu zračnog saobraćaja;
- kontrolu frekvencija;
- druga pitanja iz oblasti saobraćaja i komunikacija.

Predsjedavajući Komisije je Branko Dokić, prvi zamjenik predsjedavajućeg je Šemsudin Mehmedović, a drugi zamjenik je Slavko Matić. Ostali članovi Komisije su: Sadik Bahtić, Selim Bešlagić, Savo Erić, Husein Nanić, Željko Kuzmanović i Mehmed Suljkanović.

Predstavnički dom je, na 50. sjednici, održanoj 1.4.2009., imenovao Željka Kuzmanovića za novog člana Komisije, umjesto Snježane Rajilić, koja je 7. 11. 2008., prihvatila mandat načelnika Općine Bosanski Novi - Novi Grad, pa joj je odlukom Centralne izborne komisije BiH predao mandat u Predstavničkom domu.

Sekretar Komisije je Ahmed Jalovičić.

1.1 Unutrašnja organizacija i procedura

Komisija je aktivnosti zasnivala na Orijentacionom planu rada Predstavničkog doma za 2009. godinu i Planu rada Komisije za 2009. godinu, te obavljala poslove iz svoje nadležnosti u skladu s procedurama utvrđenim Poslovníkom Predstavničkog doma.

Nakon što Komisija dobije određene materijale koji se mogu smatrati tačkom dnevnog reda, predsjedavajući Komisije u saradnji sa sekretarom organizira održavanje sjednice, te utvrđuje prijedlog dnevnog reda.

Poslije obavljene rasprave o tačkama dnevnog reda koje su razmatrane na sjednici, Komisija je većinom glasova usvajala mišljenja i izvještaje, odnosno donosila zaključke, koji su odražavali stav Komisije. Rezultati glasanja o svakoj tački dnevnog reda zapisnički se konstatiraju.

2. Aktivnosti Komisije u izvještajnom periodu

U izvještajnom periodu Komisija je održala 18 sjednica, s ukupno 86 tačaka dnevnog reda, u okviru kojih je usvojila 31 zaključak.

Na 27. sjednici Komisije, održanoj 22. 1. 2009., usvojeni su Izvještaj o radu Komisije za 2008. godinu i Orijentacioni radni plan Komisije za 2009. godinu.

Osim zakonodavnih aktivnosti, potrebno je istaći razmatranje i informacija, izvještaja i drugih akata iz nadležnosti Komisije, kao i aktivnosti koje je Komisija sama inicirala. Prosjek prisustva članova Komisije sjednicama Komisije je 76 %, a sjednice su u prosjeku trajale sat i 15 minuta.

Članovi Komisije učestvovali su na nekoliko seminara i drugih sastanaka na poziv određenih domaćih i međunarodnih institucija, kao i na vlastitu inicijativu.

2.1 Zakonodavne aktivnosti

Komisija je u 2009. godini razmatrala 12 prijedloga zakona, i to:

1. Prijedlog zakona o zrakoplovstvu BiH, predlagač: Vijeće ministara BiH (završena druga komisijska faza - pozitivan izvještaj) - Zakon je usvojen i objavljen u "Službenom glasniku BiH", broj 39/09;
2. Prijedlog zakona o Agenciji za pružanje usluga u zračnoj plovidbi BiH, predlagač: Vijeće ministara BiH (završena druga komisijska faza - pozitivan izvještaj) - Zakon je usvojen i objavljen u "Službenom glasniku BiH", broj 43/09;
3. Prijedlog zakona o unutrašnjoj i pomorskoj plovidbi, predlagač: Vijeće ministara BiH (završena prva komisijska faza - pozitivno mišljenje) - Predstavnički dom na 46. sjednici nije prihvatio Prijedlog zakona u prvom čitanju;
4. Prijedlog zakona o dopuni Zakona o Javnom radiotelevizijskom sistemu BiH - predlagač: Vijeće ministara BiH (završena druga komisijska faza - pozitivan izvještaj) - Zakon je usvojen i objavljen u "Službenom glasniku BiH", broj 35/09;
5. Prijedlog zakona o prijevozu opasnih materija - predlagač: Vijeće ministara BiH (završena prva komisijska faza - pozitivno mišljenje) - Predstavnički dom na 47. sjednici nije prihvatio Prijedlog zakona u prvom čitanju;
6. Prijedlog zakona o poštama Bosne i Hercegovine - predlagač: Vijeće ministara BiH (završena druga komisijska faza - pozitivan izvještaj) - Predstavnički dom na 61. sjednici nije prihvatio Prijedlog zakona u drugom čitanju;
7. Prijedlog zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini - predlagač: Zajednička komisija za ljudska prava, prava djeteta, mlade, imigraciju, izbjeglice, azil i etiku (završena druga komisijska faza - pozitivan izvještaj) - Zakon je usvojen i objavljen u "Službenom glasniku BiH", broj 43/09;
8. Prijedlog zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini - predlagač: Dom naroda Parlamentarne skupštine BiH (završena prva komisijska faza - pozitivno mišljenje) - Predstavnički dom na 55. sjednici nije prihvatio Prijedlog zakona u prvom čitanju;
9. Prijedlog zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini - predlagač: poslanik Momčilo Novaković (završena

- druga komisijska faza - negativan izvještaj) - Predstavnički dom na 64. sjednici nije prihvatio Prijedlog zakona u drugom čitanju;
10. Prijedlog zakona o izmjenama i dopunama Zakona o Javnom radiotelevizijskom sistemu Bosne i Hercegovine - predlagač: Vijeće ministara BiH (prva komisijska faza – pozitivno mišljenje);
 11. Prijedlog zakona o izmjenama i dopunama Zakona o Javnom radiotelevizijskom servisu Bosne i Hercegovine - predlagač: Vijeće ministara BiH (prva komisijska faza – pozitivno mišljenje);
 12. Prijedlog zakona o izmjenama i dopunama Zakona o komunikacijama- predlagač: Vijeće ministara BiH (prva komisijska faza – pozitivno mišljenje).

2.2 Aktivnosti vezane za razmatranje i usvajanje ostalih akata

U 2009. godini Komisija je razmatrala i druge akte koji nisu zakonodavnog karaktera, i to:

1. Izvještaj Vijeća ministara Bosne i Hercegovine o aktivnostima na projektu „Autoput na Koridoru Vc“ i Plan narednih aktivnosti;
2. Izvještaj o radu i poslovanju Radio-televizije Bosne i Hercegovine u 2007. godini;
3. Prijedlog za imenovanje predstavnika Komisije za saobraćaj i komunikacije Predstavničkog doma u Vijeće za sigurnost saobraćaja na putevima BiH;
4. Razmatranje Izvještaja o radu Državne regulatorne komisije za električnu energiju u 2008. godini;
5. Razmatranje Izvještaja o radu Ministarstva komunikacija i prometa BiH za 2008. godinu;
6. Razmatranje dopisa Upravnog odbora Radio-televizije BiH u vezi s dugom prema Eutelsatu i obustavom emitiranja satelitskog programa BHT1;
7. Razmatranje Izvještaja o radu i finansijskog izvještaja Agencije za poštanski saobraćaj BiH za 2008. godinu;
8. Razmatranje Izvještaja o radu RTVBiH za 2008. godinu i Izvještaja o radu Upravnog odbora RTVBiH za 2007. i 2008. godinu;
9. Razmatranje rang-liste kandidata za člana Upravnog odbora Javnog radiotelevizijskog servisa BiH iz srpskog naroda;
10. Razmatranje prijedloga Vijeća ministara BiH za imenovanje članova Vijeća Regulatorne agencije za komunikacije BiH;
11. Razmatranje inicijative poslanika Drage Kalabića da „Predstavnički dom formira Istražnu komisiju sa zadatkom da provjeri navode o raspodjeli CEMT dozvola u Ministarstvu komunikacija i prometa BiH“
12. Prijedlog Vijeća ministara BiH da se za člana Državne regulatorne komisije za električnu energiju iz Federacije BiH imenuje Mirsad Salkić;
13. Dopis Regulatorne agencije za komunikacije u vezi imenovanja člana Upravnog odbora Javnog radiotelevizijskog servisa BiH;
14. Obavještenje Državne regulatorne komisije za električnu energiju u vezi sa snabdijevanjem Brčko Distrikta BiH električnom energijom.

3. Ostale aktivnosti Komisije

Komisija je, u saradnji s Vijećem za regionalnu saradnju (RCC) i Sekretarijatom energetske zajednice (ECS), organizirala Radionicu za parlamentarce o temi: “Energetska zajednica i

regionalna sigurnost“, koja je održana 15. decembra 2009. u Sarajevu. Učestvovali su poslanici i delegati Parlamentarne skupštine BiH, predstavnici: Ministarstva vanjskih poslova BiH, Vijeća za Regionalnu saradnju (RCC) i Ekonomske komisije Ujedinjenih naroda za Evropu (UNECE), te državni službenici iz Sekretarijata Parlamentarne skupštine BiH.

4. Opća procjena

Na osnovu navedenog, može se zaključiti da je Komisija u domenu zakonodavnih i drugih aktivnosti gotovo u potpunosti realizirala postavljene zadatke.

Komisija je kontinuirano saradivala s Vijećem ministara BiH i resornim Ministarstvom komunikacija i prometa BiH, pa su tako sjednicama Komisije prisustvovali njihovi predstavnici, koji su učestvovali u raspravama o prijedlozima zakona i amandmanima, te drugim aktima koji su razmatrani na sjednicama. Zaključci i preporuke Komisije upućeni Vijeću ministara BiH i Ministarstvu skoro su u potpunosti prihvaćeni i realizirani.

Također je ostvarena i dobra saradnja s Vanjskotrgovinskom komorom BiH, čiji su predstavnici redovno prisustvovali sjednicama Komisije.

Sastavni dio Izvještaja čini tabelarni pregled prisustva članova Komisije sjednicama.

PREDSJEDAVAJUĆI KOMISIJE
dr. Branko Dokić